



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

### **Adversvs Omnia Catabaptistarvm Prava Dogmata Henrychi Bullingeri lib. IIII**

**Bullinger, Heinrich**

**Tigvri, 1535**

**VD16 B 9759**

De uafricie catabaptistarum

**urn:nbn:de:hbz:466:1-35433**



per deum te oro Ioiada, ut & mea proferam. IO  
IADA. Metuendum si non concessero, medius  
crepes, ita enim erumpere quæ concepisti gestiunt.  
Dic ergo quid tandem adferes, cui non sit iam centies  
responsum? SIMON. Mirum est quod uos ad  
ea respondiſſe dicitis, quæ nondum audiuiſtis. Gladius  
dei quidem ordinatio est, extra tamen perfectionem  
Christi, quo malus punitur & occiditur, bonus defen=  
ditur. In lege quidem ordinatus contra malos ad uin=  
dictam & mortem. Et ad hunc usum constitutus est  
mundi magistratus. Sed in perfectione Christi utimur  
excommunicatione tantum, ad commonefactionem et  
exclusionem eius qui peccauit. IOIADA. Ob=  
scure (ut tenebras decet) tua adducis, cupio ergo ex te  
scire quo perfectionem Christi referas, an ad caput, an  
ad corpus? Vis dicere, Christus ipse tam perfectus est  
ut gladio, hoc est, magistratu non egeat qui se emen=  
det aut puniat: an quod Christiani nihil opus habeant  
gladio aut magistratu? Nam amphibolum est, quum di=  
co perfectio Christi. Si primum, assentior dominum  
dominantium & regem regum tam abesse ut magi=  
stratu egeat, ut ne magistratus quidem sint, quibus offi=  
cium nõ sit ab eo superne datum. Si secundum, quod  
scilicet Christiani nihil opus habeant magistratu, o=  
mnibus modis renitor. Do enim istud ut facile sit tibi  
dicere: Christianus qui uere Christianus est, magistra=  
um



tu non habet opus, ex fide enim nihil obmittit eorum  
 quæ facta oportet, neq; quidquam admittit quod fieri  
 nefas est. Sed quæ nostra est calamitas, nondum inueni-  
 mus inter homines tam absolutam perfectionem, nec  
 speranda est unquam fore ut omnes qui Christum con-  
 fitentur, sint ex omni parte beati, quandiu istud cor-  
 poris domicilium circumferimus. Est ergo in hūc sen-  
 sum uere dictum: Gladius est dei ordinatio extra per-  
 fectionem Christi. Hoc est, ubicunq; membra Christi  
 non perueniunt ad eam mensuram perfectionis capi-  
 tis sui, isthic opus est gladio. Sed quantum ego uideo,  
 tu longe aliud uis, nempe, quod hæretica retinetorum  
 ecclesia gladio nihil egeat, ut quæ sit intra perfeccio-  
 nē Christi: sumitis enim uobis quod olim monachi, ui-  
 delicet esse uos in statu perfectionis? SIMON,

Iniuria me afficis, & fratrem temere iudicas, quid  
 enim ad me quod alij faciunt. IOIADA. Quan-  
 doquidem tu illorum argumentis uteris, & tam con-  
 stanter illorum opiniones asseris, quid mirum si te in-  
 ter illos recenseam? Volunt stolidissimi homines imò  
 seditiosissimi gladium tollere, quo liberius omnia con-  
 fundant. Et qui euangelium iam receperunt (nam ad  
 infideles et impios non ueniūt) circumuenire cupiūt,  
 ut gladium ponant, quo in cacoecclesia sua liberius  
 scortentur, matronas conspurcent, blandiloquio mu-  
 lierculas seducant, omnem statum turbent, imò urbes

¶ con



Et conturbantia humana diruant, sic enim poterit la-  
 tronum parua manus eorum bona qui in cōmune fer-  
 re nolunt, ui ut publica faciant cōpellere. Vnde quan-  
 to magis negāt gladium inter Christianos ferri posse,  
 tanto magis conseruari debet, uel ob istos ipsos qui tot  
 insidijs publicā pacem tentant. SIMON. Chri-  
 stus docet ut à se ipso discamus, ipse enim mitis est &  
 humilis corde, is nō reuerberat nec reserit. Deinde mu-  
 lieri in adulterio deprehēse, non dixit ut lapidaretur,  
 iuxta legem, qui tamē dixerat: Quemadmodū manda-  
 uit mihi pater sic loquor & facio: sed ex misericordia  
 eam dimittit, & admonet ne ultra peccet. Istud ergo  
 nobis in excōmunicatione seruandum. IOIADA.

Si hęc certa fide & syncera loquimini, pergite ipsi,  
 etiā si nemo uos sequatur, mites esse et humiles. Quum  
 uero nihil sit cata baptistis amarius atq; præfractius, pa-  
 lam fit mititatem non aliter doceri ab eis quā temper-  
 rantiam audiuius aliquando ab auidissimo heluone  
 doctam esse. Is quum quid edulij inferretur cuius ipse  
 esset cupientissimus, conuiuas monebat, ne raptim aut  
 immodice haurirent, sed ciuilitate contrectarent, diu  
 commanducarent, ac uoluptatem longa comminutio-  
 ne caperent, quo sibi liceret uberius ingurgitare. Sic  
 quum istis nihil sit truculentius, (Quę enim etas ta-  
 lem maledicentiam unquam uidit?) alios ad Christum  
 relegant, ut mansuetudinem discant, ipsi longissime ab